

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

दिनांक 02.11.2024

18.10 शनिवार

प्रमुख समाचार –

- 1— प्रदेश के नवा औद्योगिक नीति काली एक नवंबर ले लागू होंगे हे।
- 2— प्रदेश के रायगढ़ जिला म अवइया चार दिसंबर ले होवइया अग्निवीर भर्ती रैली बर अभ्यर्थी मन ल प्रवेश पत्र जारी कर दे गेहे।
- 3— राजधानी रईपुर समेत देसभर म आज गोवर्धन पूजा अउ अन्नकूट के तिहार उछाह अउ खुसी के संग मनाय जावत हे।

समाचार विस्तार ले

नई औद्योगिक नीति-लागू-01

प्रदेश के नवा औद्योगिक नीति काली एक नवंबर ले लागू होंगे हे। पाछू अट्ठाईस अक्टूबर के प्रदेश मंत्री मंडल के बइठका म नया नीति ल मंजूरी दे दे गे रिहीस। ए नीति इकतीस मार्च दू हजार तीस तक बर लागू करे गेहे। नवा नीति म तय करे गे हे कि सर्विस सेक्टर के उद्योग स्थापना ल बढ़ावा दे जाही। उद्योग लगाय बर कतकोन वर्ग के लोगन ल बिसेस छूट दे जाही। नवा नीति म तय करे गेहे कि राज्य के कोरबा, बिलासपुर, रायपुर म मध्य भारत के इंडस्ट्रियल कॉरिडोर बनाय जाही। एमा तीनो सहर म ट्रेन, एयर कनेक्टिविटी, सड़क के सुविधा, पानी, बिजली अउ उद्योग लगाय बर जमीन मुहइया कराय बर जोर दे जाही।

उद्योग मंत्री लखन लाल देवांगन ह बतइन कि नवा औद्योगिक नीति म राज्य के युवा मन बर स्थानीय स्तर म एक हजार ले जादा रोजगार के प्रोजेक्ट सुरू करे के प्रावधान करे गेहे। बी-स्पोक पैकेज घलो युवा मन ल दे जाही। राज्य के अनुसूचित जाति, जनजाति, महिला उद्यमी, सेवा निवृत्त अग्निवीर सैनिक, भूतपूर्व सैनिक, जेमा पैरा मीलिट्री घलो सामिल हे, ल बिजली, पानी, जमीन के सुविधा म छूट दे जाही। माओवाद प्रभावित, कमजोर वर्ग, तृतीय लिंग के उद्यमी मन घलो नवा औद्योगिक पॉलिसी म बिसेस प्रोत्साहन के पात्र होही, ओमन ल घलो उद्योग लगाय बर कतकोन सुविधा म छूट मिलही। एखर अलावा सरकार ह ब्याज अनुदान, लागत पूंजी अनुदान, स्टाम्प सुल्क छूट, विद्युत सुल्क छूट, वैल्यू एडेट टेक्स के प्रावधान करे गेहे। नवा नीति म मंडी सुल्क छूट, दिव्यांग रोजगार अनुदान, पर्यावरणीय प्रोजेक्ट अनुदान, परिवहन अनुदान, नेट राज्य वस्तु अउ सेवा कर म घलो छूट दे जाय के प्रावधान हे।

नई औद्योगिक नीति-लागू-02

नई औद्योगिक नीति म विकासखंड ल तीन समूह म बांटे गेहे, जेमा पहला समूह विकास सील के हे। एमा दस विकासखंड हे, जिहां उद्योग के काम होवत हे। दूसर समूह अइसन हे जिहां काम कमती होय हे। एमा इक्सट ठन विकासखंड हे। उहें, तीसरा पचहत्तर विकासखंड के समूह हे जिहरं औद्योगिक मामला म अति पिछड़ा पन हे जिहां कोनो काम नइ हे। अइसन जघा म उद्योग विकास के दिसा म काम करे के तियारी हे।

नवा नीति म राज्य के प्रसिक्षित लोगन ल जोड़े बर हरेक व्यक्ति पंद्रह हजार रुपिया के ट्रेनिंग फंड दे जाय के नियम घलो बनाय गेहे।

बस्तर ओलंपिक-लोगो अनावरण

मुख्यमंत्री विष्णुदेव साय ह आज बस्तर ओलंपिक दू हजार चौबीस के लोगो अउ शुभंकर के अनावरण करीन। ओमन ह एखर सफल आयोजन बर अपन सुभकामना दीन हे। लोगो अउ शुभंकर म बस्तर के संस्कृति अउ परंपरा के झलक देखे बर मिलत हे। पहाड़ी मैना अउ वन भैंसा ल बस्तर ओलंपिक के शुभंकर बनाय गेहे। बस्तर ओलंपिक ल वन्य जीव संरक्षण मन ल समर्पित करे गेहे। कारीकरम म उप मुख्यमंत्री अरुण साव अउ विजय शर्मा, खेल अउ युवा कल्याण मंत्री टंक राम वर्मा मौजूद रिहीन।

खबर के मुताबिक एक नवंबर ले सुरु होय ए आयोजन म बीस नवंबर तक विकासखंड स्तरीय खेल प्रतियोगिता कराय जाही। उन्हें, इक्कीस ले पच्चीस नवंबर तक जिला स्तरीय अउ छब्बीस ले तीस नवंबर के बीच संभाग स्तरीय प्रतियोगिता होही। बस्तर ओलंपिक म एथेलेटिक्स, तीरंदाजी, बैडमिंटन, फुटबॉल, हॉकी, वेटलिफ्टिंग, कराटे, कबड्डी, खो-खो, व्हालीबॉल अउ रस्साकसी जइसन खेल मन ल सामिल करे गेहे।

अग्निवीर भर्ती-एडमिट कार्ड

प्रदेस के रायगढ़ जिला म अवइया चार दिसंबर ले होवइया अग्निवीर भर्ती रैली बर अभ्यर्थी मन ल प्रवेस पत्र जारी कर दे गेहे। प्रदेस के सबो तैंतीस जिला के पुरुष उम्मीदवार मन बर अग्निवीर जनरल ड्यूटी, अग्निवीर तकनीकी, अग्निवीर ऑफिस असिस्टेंट, स्टोर कीपर अउ अग्निवीर ट्रेड्समेन बर भर्ती के आयोजन करे जावत हे। ए भर्ती रैली बारह दिसंबर तक चलही।

खबर के मुताबिक सेना डहार ले पाछू बाईस अप्रैल ले तीन मई तक ऑनलाइन सामान्य प्रवेस परीक्षा के आयोजन करे गे रिहीस, जेमा पास होय उम्मीदवार मन ह सारिरीक दक्षता जइसन दूसर भर्ती प्रक्रिया म भाग ले सकही। रैली म भाग लेवइया योग्य अभ्यर्थी मन ल प्रवेस पत्र वेबसाइट अउ ई-मेल म भेज दे गेहे। भर्ती म हिस्सा लेबर एडमिट कार्ड अउ सबो जरूरी दस्तावेज लेके जाना होही। संगेसंग आधार कार्ड ले जुड़े मोबाइल ल घलो लाना होही।

अभ्यर्थी रैली ले जुड़े कोनो भी प्रकार के जानकारी बर रईपुर के सहीद वीर नारायण सिंह अंतर्राष्ट्रीय क्रिकेट स्टेडियम तीर सेना भर्ती कार्यालय ले संपर्क करे जा सकत हे।

स्थापना दिवस-दीप प्रज्जवलन

छत्तीसगढ़ राज्य के चौबीसवां वर्षगांठ अउ दीपावली के मउका म मुख्यमंत्री विष्णुदेव साय काली नया रईपुर के एकात्म पथ म ग्यारा हजार दीप प्रज्जवल कारीकरम म दीया जलाके प्रदेसवासी मनके खुसहाली के कामना करीन। मुख्यमंत्री ह किहीन कि हमर राज्य अपन संस्कृति अउ विविधता के संग देस के विकासयात्रा म अपन बड़े भूमिका निभावत हे। ए दिन ह राज्य के लोगन बर गर्व अउ उत्सव के मउका हे।

कारीकरम म दीया जलाय के संग आतिसबाजी घलो होइस। ए मउका म मधुर संगीत के धुन ले माहौल अउ सुघर होगे। स्थल म रंगोली सजाय गे रिहीस अउ स्थापना दिवस के प्रतीक चिन्ह के संग सेल्फी पाइंट म लोगन सेल्फी लेवत रिहीन।

ए मउका म नवा रईपुर म नवा बने सीबीडी रेलवे स्टेशन तीर होवत कारीकरम म अउ एकात्म पथ म श्रमिक अउ सफाई कर्मी मन ल मिठाई बांटे गीस।

खबर के मुताबिक छत्तीसगढ़ के स्थापना के पाछू ए उद्देश्य हे कि क्षेत्र म विकास के गति ल बढ़ाय के संग इहा के सांस्कृतिक अउ भाषायी पहिचान ल मान्यता देना अउ लोगन ल बेहतर प्रशासनिक सुविधा देना।

गोवर्धन पूजा

राजधानी रईपुर समेत देसभर म आज गोवर्धन पूजा अउ अन्नकूट के तिहार उछाह अउ खुसी के संग मनाय जावत हे। आज के दिन गौ-माता के पूजा पाठ करके खिचड़ी के भोग लगाय जाथे। आजैच के दिन भगवान कृष्ण ल घलो खिचड़ी खवाय जाथे अउ अन्नकूट के भोग लगाय जाथे अउ संगेसंग गोवर्धन पूजा घलो करे जाथे। छत्तीसगढ़ म भगवान शंकर अउ माता पार्वती के बिहाव घलो कराय जाथे। गली मोहल्ला मन म भगवान भोलेनाथ के बरात धूमधाम ले निकाले जाथे, जेला गौरी-गौरा के नाम ले जाने जाथे।

मुख्यमंत्री विष्णुदेव साय ह आज गोवर्धन पूजा के मउका म अपन निवास के गौसाला म गौ परिवार के पूजा-पाठ करीन अउ अपन हाथ ले खिचड़ी अउ गुड़ के भोग लगइन। ओमन ह प्रदेसवासी मन ल गोवर्धन पूजा के बधई अउ सुभकामना देवत प्रदेसवासी मनके सुख-समृद्धि अउ खुसहाली के कामना करीन हे। अपन सुभकामना संदेस म श्री साय ह किहीन हे कि गोवर्धन पूजा अउ अन्नकूट लोकजीवन ले जुड़े तिहार हे। छत्तीसगढ़ म ए दिन गौ-पूजन के परंपरा हे। हमर सनातन संस्कृति ह हमन ल सबो जीव उपर दया करना सिखाय हे। अन्नकूट के तिहार घलो हमन ल ए संदेस देथे। श्री साय ह किहीन कि गोधन ह, खेती अउ जन-जीवन के महत्वपूर्ण आधार हे। गोवर्धन पूजा ह सिरिफ गौवंश के पूजा- आराधना के परब नही हे फेर ए ह गौवंश के सुरक्षा अउ सेवा के संकल्प के परब हे।

नकली नोट-गिरफ्तार

कोंडागांव जिला के फरसगांव पुलिस ह नकली नोट के सप्लाई के मामला म एक इन अंतर्राज्यीय आरोपी ल गिरफ्तार करे हे। पुलिस ह आरोपी तीर ले पांच-पांच सौ के नौ ठन नकली नोट बरामद करे हे। आरोपी ह उत्तराखंड के रहइया हरय। पहिली होय नकली नोट के मामला म गिरफ्तार आरोपी ले पूछताछ के बाद ए आरोपी ल गिरफ्तार करे गेहे।

दुर्घटना

राजनांदगांव जिला म एक ठन फटफटी ह अंततंतं होके खंभा ले टकरा गीस। ए हादसा म दू इन युवक मनके मउत होगे। मिले जानकारी के अनुसार स्टेसन पारा के रइहया दूनो युवक मन आज बिहनिया मोटर साइकिल म घूमे बर निकले रिहीन। इही दउरान नगर निगम के आगू मोटर साइकिल अंततंतं होके बिजली खंभा ले टकरा गीस। घटना के बाद गंभीर रूप ले घायल दूनो युवक मन ल मेडिकल कॉलेज अस्पताल ले जाय गीस, जिहां डॉक्टर मन ह ओमन ल मृत घोसित कर दीन।

मौसम

अउ अब पेस हे मौसम के हाल...

प्रदेस म ए महिना बरसा के गतिविधि सामान्य ले कमती रहे के संभावना हे। अधिकतम अउ न्यूनतम तापमान घलो प्रदेस म सामान्य ले कमती रहे के संभावना हे। राज्य म सुष्क हवा चले के सेति मौसम के सुष्क रहे के आसार हे। उहें, न्यूनतम तापमान म मामूली गिरावट हो सकत हे। फेर अधिकतम तापमान म कोनो बिसेस परिवर्तन होय के संभावना नई हे। आसमान साफ रइही।
